

STRONG BILONG OL MERI LIDA LO HAUSLAIN/PLES: OL STORI IKAM LONG OL LIDA BILONG LUMUSA INSAIT LONG PNG MERI FAMA BISNIS PROJEK

Stori bilong Nuni

Nuni em wanpela gel namel long 6pela pikinini. Nuni ibin go long skul long sotpela taim tasol, tasol em save amamas tru long go long sande skul olgeta taim. Em marit taim em yangpela yet na igat femili bilong em yet nau. Em ino save tingim em yet olsem wanpela lida, na em ting long em yet olsem wanpela 'meri na mama nating'. Long taim em liklik yet ikam, ino gat wanpela wok em wokim i olsem stap lida bilong ol narapela. Tasol dispela i senis long taim projek ikam. 'Mi ino bin gat sans long kisim dispela wok bilong kamap lida long taim mi yangpela yet na mi ino save olsem mi bin gat o mi inap long kamap lida long pastaim, na ikam inap long taim [ACIAR] projek ikam long Lumusa...'

Pastaim Nuni pilim poret na surik liklik long taim ol i save askim em long kamap wanpela meri igo pas long projek grup/tim. Em i tingim bek olsem long stat bilong projek, em painim hat tru long makim ol hauslain tisa ol kolim long Village Community Educator (VCE), na bihain long en long sapotim ol VCEs long painim na kisim ol fama long wok wantaim ol. Tasol em i bin pilim amamas na bel isi stret taim em lukim olgeta lain kam kamap long wokim trening long nambawan taim tru.

Wanpela yia igo pinis nau na dispela grup/tim i stap yet na wok bung wantaim na Nuni i pilim olsem hauslain i rispektim em. Em i kisim strong pinis na olgeta lain igat luksave long em long taim bilong ol miting long hauslain. Nau em inap long iken go pas long kamapim ol bikpela bung bilong sios, na tu long sanap na toktok taim ol planti lain i bung. Tasol wok lida em ino isi, em kam wantaim ol hevi bilong em. Sampela taim Nuni i painim hat long kamap wanpela gutpela piksa bilong ol VCEs. Na tu sampela tumbuna pasin/rot bilong wok na go pas long kirapim samting taim yu stap olsem lida i hat. 'Ol hatwok/hevi bilong stap wanpela lida – long sait bilong pasin tumbuna igat bikpela hevi tru sampela taim. Taim mi stap olsem wanpela lida insait long hauslain bilong mi, mi bin givim aut planti samting olsem mani o pik taim ol hevi ikamp. Mi mas wokim dispela, bilong wanem, man bilong mi em hauslain lida tu.'

Maski ol dispela hevi i stap, Nuni i amamas tru long stap olsem projek lida long hauslain biong em. Em tok man bilong em save sapotim em long olgeta samting em i bin mekim. Nuni tok man bilong em i soim amamas na laik bilong em long ol nupela pasin na way ol i wok long lainim, na dispela em bikpela samting long Nuni na gutpela bilong femili bilong ol.



STRONG BILONG OL MERI LIDA LO HAUSLAIN/PLES: OL STORI IKAM LONG OL LIDA BILONG LUMUSA INSAIT LONG PNG MERI FAMA BISNIS PROJEK

Nuni save wok hat tru na i save kisim strong long ol pikinini bilong em – tingting bilong putim ol pikinini long skul na bihain bilong ol i save kirapim em long mekim dispela wok igo yet. 'Mi i wok hat tru long wanem mi laikim femili bilong mi mas igat haus kakaruk, na long dispela, mi bai salim kakaruk na kisim mani na putim ol pikinini long skul. Femili bilong mi igat 4pela pik, na taim mi salim, mi bai yusim dispela mani long baim skul fi bilong ol pikinini. Mi laikim ol pikinini long mekim gut long skul na mas painim gutpela wok'.

Wanpela taim bihain, Nuni laik kamap wanpela bikmeri olsem lida bilong ol meri long sios o hauslain kansol. Na sapos em kisim pei long wok bilong em o nogat, em laik sanap strong na wok yet. 'Sapos ol ino baim mi long wok mi mekim, mi bai go het yet long toksave long ol narapela lain long ol trening mi kisim. Mi gat bikpela hamamas tru long stap olsem wanpela lida.' Bikpela as tingting bilong Nuni em long helpim na lainim ol narapela long wanem samting em lainim. Em laik go het yet long skul na save moa long sampela ol trening na sapotim femili bilong em na ol narapela. Dispela em lidasip stori bilong em.

Nuni em i wanpela bilong ol planti Hauslain Tisa (VCE) insait long PNG husait istap insait long dispela projek we ACIAR i givim moni na sapotim. Mipela i serim stori bilong em wantaim tok orait bilong em. Go long <http://pngwomen.estem-uc.edu.au/> long painim aut moa long dispela projek.